

四庫全書

集部

欽定四庫全書

集部

粵西文獻卷六十四

詳校官庶吉士_臣瑚圖禮

主事銜_臣徐以坤覆勘

總校官庶吉士_臣朱 鈐

校對官中書_臣王鍾泰

謄錄舉人_臣劉 禮

欽定四庫全書

粵西文載卷六十四

桂林府通判汪森編

傳

名宦

明廖永忠巢縣人洪武元年命為征南將軍朱亮祖為副平廣東遂進取廣西六月兵至梧州境元達嚕噶齊拜珠迎降廣西行省平章林文之亦降時元吏部尚書

布延特穆爾張翔次滕州聞永忠兵至走鬱林亮祖追之布延特穆爾戰死張翔赴水死於是潯貴等州郡以次咸附七月兵至梧州容州同知明安布哈暨普寧縣達嚕噶齊瑪嚕皆降師次貴州元鬱林知州張諾海同知王楚金降永忠因遣亮祖會平章楊璟收未下州郡八月合兵攻克靖江執元平章額爾濟訥永忠至南寧元上浪屯田千戶宋真執其守將平章約爾珠參政諾海遣使請降永忠悉收諸司印章命真守其城送約爾珠等

赴京九月元平章阿爾斯蘭以象州降廣西悉平

朱亮祖六安人以參政佐永忠平廣東師次梧州張諾海降至靖江與楊璟合破靖江師旋封為永嘉侯

楊璟合肥人洪武元年為征南將軍偕左丞周德興參政張彬等帥軍攻靜江克之先是張彬屯南關攻城為守者所詬恚曰城破當屠之比克城璟下令曰殺人傷人及剽掠者死彬乃止又遣兵下柳象南寧太平田州土官黃英岑伯顏皆遣使齎印降廣西悉平

左君弼廬州人洪武元年廣西衛指揮僉事二年冬十月左江上思州蠻賊黃英傑聚衆萬餘寇鬱林州知州趙鑑同知王彬集民兵拒守賊攻圍半月不下廣西海北等衛官軍來援賊夜遁追至上思州境破之賊走還仍聚黨不解事聞上命君弼為副總兵討捕英傑與其弟英覽逃之十萬山七洞口君弼追及之英傑陣死英覽就俘自是兩江獐首膽落四年春又以平溪洞蠻獠有功賜綺帛二十疋

蘭以權襄陽人洪武元年官中書照磨上初平廣西遣以權齎詔往諭兩江溪峒民至廣西衛鎮撫彭宗萬戶劉惟善以兵護送將抵兩江會來賓峒人潘宗富寇掠急督宗等擊敗之遂安輯其衆兩江由是懾服

嚴震直字子敏烏程人以督賦太祖聞其名洪武二十三年擢布政司叅議之職留中署通政司事二十八年西龍州趙宗壽襲其叔知州任不俟朝命自雄長其地羣臣議興師問罪龍州遣使往諭安南一觀其嚮震直

奉命撫諭國王陪臣皆俯伏聽命廣東西鹽運為官民病上奏減其半二十九年奉命復至廣西立法接運以通行鹽商民便之桂林興安靈渠久圯震直召縣屬審地勢浚源疏流因其故道延袤五十餘里導南江曰灘北江曰湘築堤岸治陡閘修石渠以便行者通石函以利灌溉旁通靈川千秋峽鏟象鼻石峰焚鑿江灘礙舟之石自是往來無虞桂林梧州興安諸文學掾咸備紀述謂秦史祿漢馬援千載之後至震直當為三人云居

廣且幾年每督有司均徭賦整風俗貪婪者咸為斂迹而錄囚尤稱不濫久旱得雨人以為決獄無冤所致士民共歌之獠民嘯聚依險阻者又草檄招撫屢年逋逃皆趨事有司邊徼以寧

王祐字子啓泰和人廣西平初置官府簡御史往任憲司以尋适為按察使祐及胡壽昌為僉事壽昌曰古亂國用輕典祐曰蠻夷之人素昧君臣父子之分瀆倫傷化不及此時明禮法以示勸懲後將難制适從之分按

郡縣吏民震悚适風節凝峻獄訟剖決如流民無有稱
寃者壽昌字子祺吉水人行部慮囚三四覆不厭人稱
其平融州石刻有元祐黨人碑立命碎之

蔡遷廣西行中書省參知政事廣右初附諸蠻間叛遣
遷叅省兼靖江王相叛者相繼殄滅卒於官遷為將十
五年每戰輒勇奮獨出橫刀突陣左右揮擊敵皆披靡
却走不敢近既還而金瘡滿體人視之不可堪而遷略
不以為意及卒詔贈資政大夫追封安遠侯諡曰武襄

代遷者為丁玉

丁玉洪武初任廣西行中書省參政兼都指揮使以仁惠為政軍民悅服

葉砥字履道括蒼人洪武庚戌進士累陞廣西按察僉事用法平恕獄無冤滯吏畏而民愛之嘗兼綰三道印出按郡至遷江會洞獠數出沒為寇害吏民洶洶欲遁去且以無備諷公請少避公曰我去汝縣官必遁民何恃以安即命料丁壯立保伍寇來併力禦之寇卒不敢

至

臧哲諸城人洪武間以儒士授禮部主事轉兵馬指揮發奸摘伏不避權豪尋陞四川左叅政未幾陞廣西布政使以母喪去官上賜之米鈔云

張信河南人洪武二年丞平樂政務大體時當安輯之後屬意拊循課農桑興學校後以課最擢平樂府政譽宣平終始如一士民稱之

方圓金華人洪武間南寧知府盡心撫字民甚服之

沈忠洪武中知潯州府稟性剛毅優於政事時徭賊出沒為地方患忠率兵勦撫賊懼而降一方遂安

何源字幼澄吳江人洪武中知梧州府民饑衆議請於上賑之源曰若請而後賑民其死且徙矣乃捐俸勸分以拯民賴以活

劉燾洪武間知柳州府寬厚不苛有欲私宰耕牛者牛悲入府悲鳴若訴召其人詰之諭以仁愛牛賴以全

趙天鑑洪武三年知鬱林州清介自持愛民如子擢知

太平府

周仕淵蘄水人由太學生洪武間任平樂府推官言論常依名節所推按悉麗於法而以人情通之

陳璉字廷器東莞人洪武中桂林教授以師道自任嚴立教條日勵諸生進學修德人材遂盛於一時武臣子弟習禮於學者璉隨事誨之咸知自檢都督韓觀性峻急好嫚罵亦知禮重稱為先生相與抗禮後官至南京禮部左侍郎致仕卒年八十五

王清洪武初為容州同知寇盜蔓衍民不聊生清繕城
隍立學校撫綏百姓勸課農桑民賴以蘇陞本州知州
章復鄱陽人洪武元年擢全州同知惠政甚多未幾進
本州知州課農興學百廢咸舉暇日引諸儒飲射讀法
專以禮讓為治無不感服五年夏大旱免冠徒跣詣
郡西覆釜山泣請甘雨隨至七年夏又旱亦如之其為
治有古循良風引年致仕湘人誦之嘗樹松亘百餘里
修葺茂蔭今大者五十圍為州巨觀

趙文錢塘人洪武七年知藤州廉以自持誠以待物政尚仁恕秩滿去民有言及者輒流涕焉

劉瑜洪武中橫州知州政聲大著甫三年以績最陞懷慶知府

呂升洪武末橫州知州清謹寬厚敦行古道民甚德之蔡誠洪武末知鬱林州慈祥愷悌有守有為值歲饑發倉以賑不俟上報卒於官百姓思之如慈母

李習淮安人洪武元年僉判全州尋陞同知與守章復

協恭治郡興利補弊始建驛鋪以均力征同守所植松
今皆叅天人謂引路松比之甘棠云

韓政甫陝西人洪武元年任陽朔知縣開設衙署處官
事如家事愛百姓如已子妖人謝保珠等謀不軌政甫
即上變遣官兵捕之邑賴以康

馬宥山東人洪武元年知荔浦縣始立十七里定田賦
建縣治於荔江之上創治儒學文廟邑人久而思之

白素大名入洪武初任興安知縣時高皇帝改元廣右

初平人心未帖素至多方撫字民藉以安

康孝良洪武二年任永福知縣修舉廢墜諸制作皆所
創建今壇壝署宇手澤猶存

趙惟清洪武七年知博白縣以禮為教士知向學民樂
其生習俗丕變有中土風

常仕昭洪武中知北流縣以廉幹見稱老稚被服其惠
卒之日惟餘一氊聞者嗟歎

周吉成河南人洪武中任陽朔令勸農桑興學校有古

循良風

齊遜洪武中知平南縣尚廉節去浮靡為政嚴密吏胥不敢肆奸人愛敬之

李健洪武中知貴縣政尚清簡不事刑罰民知廉恥息訟至於學校農桑莫不獎勸興舉

王仕忠武昌人洪武中知宜山縣慈祥豈弟深得民心田里之間安靜無擾三載擢知壽州民不忍其去

張霖洪武中知馬平縣愛民如子有虎噬人告於城隍

設檻捕之明日即獲二虎峒賊為患都督韓觀統兵撫捕賊據險不服曰若張知縣來即投順霖乃衣冠入峒賊皆感隨霖出降

伍繪四會人洪武間知荔浦縣時縣治創荔江趾於財力土垣為藩繪乃遷今治砌以石建官署繕壇廟興學校

張純曲江人洪武間知富川縣治邑以平恕而卓有幹才邑治舊在鍾山下初徙今地學宮未建建自純

余顯宗辰溪人洪武二十二年以太學生知興業縣值旱蝗與民同疾苦發倉賑貸多所存活永樂間知陸川縣流移悉招復業邑人感化徵為戶部主政

李諒洪武初思恩縣丞建縣治於清潭政尚寬簡善於撫綏

王麟洪武初任陸川縣丞興創之始能興民利秩滿士民赴京保陞本縣知縣

丁勝洪武二年任義寧縣丞以幹辦稱時天下初定法

紀陵夷勝重修文廟改山川壇創急遞鋪邑中庶務煥然改觀

李原受洪武中為灌陽縣丞二十六年蠻獠寇縣原受奏調官軍勦平之二十八年始築城後雖增修然皆因其舊云

傅仕琦新喻人洪武甲戌由人材任賀縣丞勤政愛民九載考績陞荔浦知縣

彭克韶洪武間以人材舉任博白主簿政寬無瑣民蒙

其惠

顏真洪武間興業主簿課民耕稼不辭其勞

李復原雩都人洪武中平南主簿時兵荒之後民多流
亡復原勞來還集數百戶度荒田教之墾遷縣丞寇至
率民兵禦之於大境塘躍馬直前斬首數十級而還明
日復戰中毒矢以死邑人哀之立祠祀焉景泰初入祀
典扁其祠曰李迪功忠義祠

孔性善洪武間馬平主簿上言溪峒蠻雖常亂擾亦有

良心昔陳景文為令猺獞皆應差役厥後撫字乖方始仍反側誠使守令得人示以恩信諭以禍福亦當革心向化上嘉納其言命吏部凡臨溪峒郡縣擇賢守令以撫輯之

劉廷儀平南典史自李迪功勦賊之後地方雖云小康山谷猶未靖也廷儀復勦平朋化猺寇同祀名宦

徐魯華亭人洪武末富川尉時峒猺出入為患魯奏請遷縣治於千戶所從之有保障功

偶桓字孟武崑山人洪武中以薦授桂林河泊所大使
工吟咏家臨婁江因以江雨軒名其集及至桂喜所居
官舍近灘水聞江流聲謂從者曰此亦吾家江雨軒也
比見所轄漁戶簡甚歲課如期不煩勾校益自喜以為
不妨已誦覽遇風日爽朗之江臯四顧諸山意有所屬
即召漁舟載之往近則薄暮遠則經宿乃歸以滿去官
李德字仲修番禺人洪武中以薦累官改義寧縣學俗
甚陋生徒有吉凶事當告假者察其貧以楮幣賙之孜

卷之十四
攷勸諭使約束鄉黨不得為惡習俗日美科貢漸盛以
倦遊歸卒

周三傑潯州衛指揮使鎮守平南徭賊出掠奮不顧身
勦禦有方後中藥矢而亡因與李迪功郎同祀

張禮興化人洪武時任桂林右衛鎮撫素性忠勇值安
南亂奉令提師征勦禮英銳為士卒先竟入重圍力竭
帶傷回陣而卒裹屍歸葬恤錄贈武德將軍

何輔宜春人監生建文三年永淳知縣公勤撫字興學

育才民甚德之陞應天府推官

蕭遵字用道別字坦行建文初以懷才抱德薦擢靖江府直史授承直郎時靖江悼僖王好學雅敬重之召入翰林修類要太宗嗣位陞右長史授奉議大夫永樂元年從王之國桂林初至凡國中祭祀所需下有司備其後凡祭祀之需府寮屬皆勸王下有司備坦行曰初至倉猝不能自備可一行之不可以再且祀神在致吾誠使人代備物非誠況未請於朝而擅使民非制乃止後

坦行進表詣京師王府竟下有司備祭物事聞長史以下皆得罪王始悔不用坦行言坦行數言於王宜務善納言以厚德奉法愛人以保福又啓陳八事曰慎起居寡嗜慾勤學問養德性簡鞭朴之刑無侵下人之利常接府僚以通羣情簡擇謹厚之人以備差遣又作端禮體仁遵義廣智四門箴以進王問四門之名遺信何也對曰五常之信猶五行之土實有仁義禮智之德即信在其中王又問古今人多好名何也其意以譏坦行之

屢有言對曰君子必不好名名與實譬諸影與形有形
斯有影有實斯名隨之矣河間東平皆有實德故其令
名在世與日月同一悠久惟殿下勉夫在己之實耳凡
於進講之際必反覆數暢其旨

韓觀字彥賓鳳陽虹縣人父成事高皇帝追封高陽侯
觀襲為廣西衛指揮僉事陞廣西都指揮使在鎮申嚴
紀律軍中無敢違令者初蠻寇不靖數出焚劫郡縣殺
守吏邊民苦之命觀勦捕觀出人人用命獲寇必治以

峻刑間宥一二遣歸諸蠻聞觀用刑皆膽落不敢復出
為害由是境內得安後召還京永樂改元拜征南將軍
鎮江西數月復鎮廣西四年從征交趾與効勞績九年
復命鎮交趾至十二年卒

歐陽和字允和泰和人永樂間出按廣西桂林有悍卒
七八人專以興滅獄訟為事持官府短長恐喝以濟其
欲雖帥閫亦畏之莫敢誰何君至衆稍戢比復大肆捕
告者毆擊幾死君陰戒吏盡獲之詰其前後所為不法

事多應死衆皆服一夕俱自盡獄中闔境稱快

熊概字元節豐城人永樂辛卯進士十六年按察廣西
戢吏姦恤民隱屬谿峒蠻獠大出殺掠布政使議欲請
於藩王出兵以遏之概曰吾等受方面之寄寇至無計
捍禦乃以煩藩王事聞誰任其咎寇必不至戒嚴而已
既而果然有居官而沒於其土者家以道遠弗能還朝
廷詔所在給舟車歸之有司迫促甚至概念男女生聚
有年一旦遣行貲用凋落奏乞聽其便從之

蘇恭則樂昌人洪武丁卯舉人授刑曹陞廣西右叅政
廣西徭蠻多反側寬恤柔服率從要東永樂四年會師
征交趾僭運給軍糧餉不乏又會征南將軍韓觀勦柳
慶徭賊所至有功觀性躁好殺恭則數諫止之全活甚
衆人號為蘇佛子

林興祖字伯禎福清人舉孝廉永樂間廣西右叅議時
安南逆命朝廷方出師討叛命馳驛之任既至即躬詣
邊境周視嶮易繪圖以進且獻所規畫踰年安南平郡

縣其地調交趾綏輯降附振起凋殘夙夜盡心焉公在交趾再歲朝京師至藤縣卒

羅觀永樂二年知梧州府恤民瘼課農桑政尚平易有古循吏風

翟迪淄川人永樂間知慶遠府政尚寬簡人心信服九載考績三州六邑之民請留得再至民愈便之

陳友常丹徒人永樂間以廣東憲副改知平樂府剛果敢決獨持三尺而中實平恕未嘗以毛舉鷙擊為能葺

學宮正祀典所行多實政云

劉銘吉安人永樂元年判梧州誠信廉明藤縣有殺繼母者獄久不決忽有蛇蜿蜒來廷下首如有所訴劉曰此繼母冤致邪蛇俯首去卒正其法尋以招懷瓊黎功擢知瓊州

譚壽海字信潮瀧水人永樂乙未進士辭不能剽劇乃就桂林教授清恬簡樸無求於世官滿徑歸

廖謹字慎初順德人永樂中桂林訓導性樸實不能諛

上官人或以俚語笑之為古必謂泥古不通也乃作古必解以自嘲其教人以執禮為先羣從兄弟嘗受學者終身莫敢與鴈行立人以是高之

吳蒙永樂元年知博白縣寬和愛民以艱去民遮道擁留

謝有立龍川人永樂元年令懷集廉慎公恕吏畏民懷十年清節如一日秩滿邑人乞留擢本府通判

周永贛縣人永樂二年任興安知縣公勤廉幹愛恤黎

民雖政務繁錯而民不擾

余存諒高要人永樂三年知容縣綏流民撫猺獞時王師征交趾諒率部伍運糧民無逃亡者擢衢州守

高謙揚州人永樂四年知陽朔縣有惠政

張光茂名人進士永樂八年知陽朔縣有善政民切去思

鄭曦福建人永樂十年知永福縣先時獞賊陸梁燒燬縣治公下車捐俸重建築土為城增修學校又立永福

蘭麻牛擺理定等堡建蘭麻驛擾攘之時經畫甚至
張昊海康人永樂中令平樂愛民如子嘗奏復軍營侵
地建朔堂宇廨舍民立祠祀之

蕭嘉祐新會人永樂間知恭城縣推誠治民民皆信之
雖山谷猺氓以片紙招之依期而至無有後者聽政之
暇與諸生講學士風丕振

孫迪太平州人監生永樂十二年知陽朔縣克振紀綱
人民畏服

彭清錢塘人舉進士永樂十六年知容縣先縣無城永樂六年知縣黃昇始城之建立學校清繼至草昧經營席不暇煖修撰邑志神思淵畜著八景詩歌風流標致擬之蘇長公寓惠志云

莫若善南海人監生永樂二十二年知陽朔縣視民如子思之不已

朱攀麒字賢瑞桂陽人以人才薦永樂初任陽朔主簿衣粗飯糲廉介自持凡令長一政之善贊助獎勸惟恐

後脫有不便於民者亦必宛轉諷諭務寢其事乃已詢
民隱薄徭賦民稱之

何旭恭新淦人永樂六年宜山縣尉施政有方甚得民
心十年以薦赴京父老張子貴等五十餘人保留十一
年以事逮去父老八十餘人復往告保十四年復職
陳英弼東莞人永樂間興業教諭修學校立條約克敦
師道訓迪惟勤士類獲成就者甚多

湯有容字載行新會人歷任恭城興安教諭永樂間復

任容縣諭值縣大疫皆謂疫能染人人莫敢出雖縣門無行者知縣彭清中其病凜然一身自分必死有容日令家人具湯粥而自節宣之晝夜不離其側清得不死時人以為難

胡綱望江人洪熙間知興業縣剛介有方體恤民情敦崇禮教革弊除奸士民悅服奉委轉運潯梧二州糧往來交趾民不擾而事奏績歷任九年終如其始

山雲徐州人宣德初以都督僉事充總兵官挂征蠻將

軍印出鎮廣西先是廣西谿峒猺獞叛服不常雲至鎮之以靜煦之以仁嚴號令公賞罰平柳州慶遠蠻寇前後十餘戰皆身先士卒無不感奮至臨機應變人莫能測故所向無前咸以為神其馭土官一以威信且廉介自持一毫非義弗取由是蠻夸懾服居民安堵進都督同知及卒廣西之人立祠祭之贈懷遠伯謚襄毅

胡智字宗愚會稽人永樂進士宣德間廣西副使龍州與交趾思郎州連歲交兵爭地智定以公議交人不敢

復爭景泰初陞廣西左布政使致仕

唐復字永亨毘陵人宣德初知平樂府勤恤民隱剔刷吏弊嘗葺郡治建文廟尊經閣堂廡齋舍一時並舉於明倫堂後復建書樓繪古勤學者於四壁以風諸生

李本河南人宣德七年知梧州府秉正疾邪不畏權勢時中貴人督貢方物沿途妄索多剝辱守令本獨肩輿詣之中使不敢肆政肅心慈父老稱之

夏伋樂平人舉人宣德間任樂平府推官郡鮮訟牘即

一二闕切夸情者以數言決之多慰遣去絕苞苴杜請託物論稱之

周健錢塘人進士初以御史言事出知交阯下洪宣德八年改知全州勤慎有為任滿民千餘詣闕請留乃進奉直大夫還治少師楊東里贈詩有歸到清湘三月暮郭南騎馬勸春耕之句君子以與柳章並稱民懷之劉虬永豐人舉進士宣德間以行人出知鬱林清慎有為民欽仰之

李齡字景齡潮陽人宣德中會試乙榜授賓州學正教士子敦本尚實一言一動不苟直指使者薦其古道古心實學實誨陞國子學正後為江西提學僉事

萬霽字季丙安福人宣德庚戌進士授陽朔知縣地僻俗陋惰於耕作霽令民墾土田春耕時具酒脯躬自勸勞令樹藝麻粟木棉課婦女紡織由是遂為沃壤新學校選俊秀躬為訓課嫁娶葬祭各有品節民立祠祀之吳錡瓊山人宣德間進士授義寧知縣重建縣治修理

公宇尤加意學校一時之士皆知向學

柳溥字廣達懷寧人襲安遠侯爵正統三年秋挂征蠻將軍印充總兵官鎮守廣西是冬征大藤峽殺賊楊容拾等五年討柳州等處六年復入大藤峽破石門等寨十年征思恩賊獲常萬王等斬之寇遂平十四年還進太子太師總神機營復命守廣西其初去廣西也營卒困於剝斂違背者衆夸獠復叛及公而又帖然

唐慎正統間巡按廣西去淫祠民云凡著赭衣過祠門

者降災慎聞之即著緋衣往焚其像廬其廟邪慝乃息
曾翬字時升泰和人宣德癸丑進士正統間官右叅政
廣西租賦多逋徵督苛急民不堪戎伍逃亡而冒支糧
餉公乃稽逋租之籍諭令漸輸戎伍實數停其冒給由
是邊儲漸充都指揮黃玘殺思明土官黃瑯父子詐言
為盜所殺獄久不決公奉臺檄會勘玘以黃金二十斤
賄公請緩其獄公拒不納具奏其罪會玘以陰謀得脫
且徵用之衆為公危公自若也太平府與交趾鄰永樂

中運鹽以餉征交之師及兵罷鹽留太平者歲撥民丁
看守民苦之公曰樹已生於鹽倉消耗多矣奈何猶累
守者邪具奏以鹽折俸而罷遣守者民皆歡呼

劉仁宅字廣居華容人永樂庚子鄉薦正統中廣西按
察副使時嶺賊蜂起柳慶路絕公撫順誅逆羣黨乃平
景泰辛未守潯州都指揮黃玠殺其異母兄思明知府
瑯及其家七百人以滅口公與叅政曾暉往治之玠使
人持金私二公於馬平驛舍且約事定後其子當得府

政則盡輸其府藏若干而父子各擁兵數萬於外以相挾撓聲勢甚熾公陽許之乃留曾公於潯為約而去至南寧珖二子來迓公伏甲士縛之曾公亦誘執珖於潯以歸論死珖陰遣人上京師造姦謀得釋罪且進位都督既益橫乃使人捃摭他事中公以報憾公亦上疏自陳事下有司未報公遽委政去天順初珖飲藥死其子政輩皆伏誅有勸公出者公不應

錢真字文煥鄞縣人正統十四年廣西叅政會遣兵討

義寧蠻所司患運道艱負謂彼中多穀輦銀就糴於事
兩便主者用之卒得其利潯州藍寇起負請往諭寇隨
解散後為左布政使時軍興餉急調度有法軍餉足而
人不擾云

陳璲字廷嘉臨海人鄉會試皆第一正統初督學廣西
日即學舍與學官弟子講論經史每月朔望從同官一
詣察院他日邀璲往遜謝之曰詣院無可言且業已有
學舍講論期矣其守正不阿如此

黃閔玉字孟清鄞縣人由鄉薦為御史正統初督學廣西自歲試外身為講解規諸生以行誼不如約者廉得其實小則記過大則治以法諸學行有聞者延入坐歡論移時與子弟不殊時兵興吳都指揮妄掠子女萬餘口閔玉為辨理而歸之部民萬口稱快以母喪去

蕭鑒字景和潮陽人宣德丁未進士正統間以御史擢廣西提學僉事躬率諸生先行後藝士風丕變景泰辛未裁革提學累官山西副使乞歸八桂生徒有官輒過

潮者多樞衣稟教有不合即庭責之其尊嚴如此

陳駿字仲良河源人永樂庚子舉人歷官屯田員外郎
遷柳州知府時馬平宜山寇起駿抵郡寇猝至圍城人
情洶洶駿從容榜投城下示以禍福許其自新寇乃狀
白其情而退駿躬歷各壘開誠諭之皆投戈去歲饑流
移滿野駿倡屬勸分計口賑之全活甚衆城池學校靡
不修葺嘗與叅將孫麒驗征勦功故事惟校首級駿必
欲俘之以訊麒不以為然既而麒遣卒張鬚者出謀逾

期不復俄獻功者至閱之得鬚首始悔服卒用駿言

衡岳字世瞻西平人正統四年桂林知府在任五年廉慎愷悌終始如一歿後二十餘年河南按察使何喬新表其墓曰廉吏桂林太守衡公人以為實錄云

陳觀湖廣人正統六年知梧州性度寬洪崇尚文雅小過必貸豪強奸吏深懲察之小有水旱憂形於色

袁衷東莞人舉進士正統間知梧州府因民俗為治務持大體飭武備治城池為計甚悉

楊禧太和人正統間以監察御史擢知慶遠府廉公有
為撫字得宜及歸軍民上章請留詔陞廣西左叅政仍
知府事民懷之

陳鼎字延器青田人監生正統間南寧知府興利除害
吏畏民懷

岑瑛思思土知府永昌子守法勤職常率兵隨征所向
克服正統間改州為府陞瑛知府廣東黃蕭養亂總兵
董興督瑛討之俘馘功多及都御史韓雍委瑛專守柳

慶大揚威武賊遂潛迹八年忻城縣峒賊韋公點出寇
賓州雍調瑛畫策進勦擒斬賊級奪回男婦甚多十二
年請以甲軍五千報效政府為軍民府瑛累立戰功擢
廣西右叅政改武階擢都指揮同知進都指揮使卒追
進驃騎將軍在任築城池創廨宇立學校建祠廟政績
大著前後受褒嘉制敕九道附祀王公祠

管霖曲靖人舉人正統間平樂府通判督徵倉糧念民
貧一切餘糶及胥徒之取潤者盡罷革之民懷其惠

陳演茂名人舉人正統間慶遠府學訓導矩矱端嚴誨人不倦隨其才器而造就人才一時甲於諸郡與諸生恩義兼盡九年陞襄府審理

林長懋莆田人舉進士正統元年以左春坊中允出知鬱林州清介自矢以德治民州民化之無訟

侯康遠弋陽人正統間橫州知州歷九載有惠政持身廉謹莅政以寬修葺學校一新陞嘉興同知民思之

張鐸字振文泰和人貢入太學歷仕兵部禮部正統丙

辰授鬱林同知鬱林僻陋風俗未盡淳君一以寬簡為
治興學校申教條暇則躬詣明倫堂集諸生講論豐其
供給蠲其徭役以課勵之由是諸生皆勉學民有兄弟
爭訟者君諭以大義使退而自思往往不終而罷州南
有廢地弗治君教旁近民使墾耕而食之曰吾不取汝
稅也凡廢地皆墾耕郡中幾無遺利田州人爭地相讎
殺久不決藩省委君及諸司官屬往平之宣布天子恩
德與不忍加兵之意按圖誌考故實俾各循其舊一毫

饋賂不得行於是皆悅服而罷

張舉番禺人舉人任全州學正教規嚴肅士知敬業

盧瑞香山人正統十四年橫州學正德足以化人學足以淑士人稱為好先生郎中樂章為之傳

張添錫桂陽人以儒士任全州訓導長於文辭士多所造就

胡濟字孟時南海人正統初知理定縣以能治劇調平南縣界大藤峽猛獠不時侵掠民多逃竄濟築城衛之

民始奠居總兵韓觀征大藤峽縣之大同朋化二里民多就俘者濟為辨釋活二十餘人民懷其德卒於官

李璿海康人正統二年知懷集縣時經蠻寇田野荒穢招集流亡民賴撫安尋擢御史

馬驥河源人正統二年知灌陽縣時尚質直驥因俗為政恩德最著

包志道合浦人舉人正統四年知府朱勤以才賢薦任靈川知縣多善政嘗修學東西齋立社學二十五所

段順孜廬陵人進士正統間上林知縣德政及民人懷其惠

馮彝連州人監生正統間上林知縣撫字勤勞民心悅服

張高湘陰人任興安知縣廉以持已恕以待人公以處事民思之

蔡榮湖廣人正統十年知永福縣為政精敏加意風教建狀元聯桂二坊以表揚先達激勵後學修學宮鑄聖

殿兩廡香爐并明倫堂鐘

李棠字宗楷縉雲人宣德庚辰進士景泰初巡撫廣西馬平韋公猛北五韋公寫與藤峽侯通等桀黠為寇各擁數千人日鈔掠棠討平之時思明黃瑄黃球謀殺知府黃瑠及其子鈞瑠蒼頭福童遁去訴棠所棠密以意授參政曾翬副使劉仁宅誘執瑄球下之獄會瑄聞中朝有易儲議因上書以請迎主者意乃即赦瑄棠以故罷歸

王翺字九臯鹽山人永樂乙未進士累官左都御史景泰三年廣西蠻寇行劫郡縣上命翺總督兩廣軍務翺推誠撫諭引其酋長向化者犒以金帛酒食多見歸順思思知府岑瑛頻年領土兵有勞人疑其反側翺為居之桂林城中禮待甚厚養其土兵如父子相視由是人思效力田州知府岑紹死於家奴其已襲知府子鏞適領兵赴調家奴呂趙挾其出亡庶長子鑑入據府治以拒鏞鏞不敢歸思明知府卒同族黃震黃道爭襲道父

兄皆死於兵或以為震當襲翺曰夸俗何倫理之有調
停之可也乃奏授鑑知府管府事鏞隸桂林總戎帳下
道授知府以慰其一家被禍之慘一時感化為之帖靜
參將范信有才畧人厭其貪兵部因事革其職聽調翺
奏復其官信卒以能將名翺清風凜然民甚德之

吳惠字孟仁吳縣人景泰間知桂林府義寧諸蠻因武
岡新寧有叛苗僭稱廣通王者遣使結連授偽官爵誘
與俱叛尚未聽從藩憲據諜言欲先發惠執不可請自

往探其實以報是日單輿徑至義寧明日入都廐等砦
諭蠻首楊文伯使相傳諭勿得輒聽叛苗誑誘文伯叩
首謝隨喚諸蠻護惠還郡惠率文伯謁藩憲乃釋去不
問叛苗揚言已得義寧蠻助恐喝州縣惠不為動久之
義寧無一叛者兵部尚書于謙劾總兵武毅黜不用惠
即上言毅功過相當黜似太甚謙劾惠惠聞畧無懼色
但曰百聞不如一見司馬雖賢高坐署中安知驅馳瘴
鄉苦哉既得報賞不治惠言陳都督旺代武恐廣無寧

日後卒如惠言在郡十年擢廣東參政

余用訥番禺人景泰六年知鬱林州時大水壅沙地田
沃為斥鹵民悲流徙訥疏請蠲米五千餘石民乃復業
擢知潯州府進階參政

李珙南安人舉人景泰間知懷集縣值寇亂盡力保障
得民心秩滿去民咸攀轅買舟送之

葉盛字與中崑山人正統乙丑進士累官右僉都御史
天順二年巡撫兩廣三年田州知府岑紹老傳嫡子鏞

頭目呂趙挾其庶子鑑拒紹而逐鏞於外時官府令鏞
寄住省城而令鑑襲其職趙於是縱兵攻破鎮安奉議
南丹向武等府州上隆恩城上林並受其害擅為鐵鉤
弔挂之刑興販私鹽偽稱名號私通交趾復夜殺鑑既
而鑑子珪亦故趙遂以幼孫呂嬰冒珪名私襲其職盛
會兵討之執趙伏誅四年藤縣民胡趙成造妖構集大
藤峽等猺賊攻陷諸縣治掠去竇家寨巡司印信荼毒
一方盛督行廣西左叅將范信等官兵擒斬成等奪回

印信五年大藤賊弗靖盛躬督兵分道夾攻破老鼠道
袍石門紫荆金龍白崖六廟仙女關通天嶺等巢七百
二十一處擒斬甚衆平之盛性清謹強力為政甚得人
和嘗請許鹽商計鹽多寡入米餉邊而後出境公私兩
利之

陳俊字時英莆田人正統戊辰進士天順間歷戶部郎
中辛巳朝廷出師征兩廣叛寇命往督餽餉時郡邑殘
破公私匱乏公弛鹽商越境之禁俾隨處貿易而每引

輸粟二斗於南雄梧州用是兵不乏食而民不出賦輿
論稱之

素凱字舜舉華亭人天順間以按察僉事治兵潯梧凱
善兵每督戰身輒疾馳為士卒先賊屯長洲村官兵遙
望有懼色凱麾兵前賊驚引去屬阻水還戰諸兵奮擊
無不一當百悉俘斬以歸葉盛上其功有中沮者韓雍
復以為言乃超遷按察使其在蒼梧收已故上海人周
昇所遺男長壽載之歸及長妻以甥女人皆高其行誼

雷復湖廣寧遠人正統丙辰進士天順四年以副使分
巡蒼梧道時藤縣民胡趙成構集大藤峽徭賊攻陷縣
治荼毒一方復承巡撫葉盛檄同廣西左叅將范信都
指揮韓瑄督指揮張錦王銘等討之擒斬成等奪回掠
去印信五年陞山東左布政使

周一清浙江臨海人進士天順成化間任慶遠知府政
尚嚴明人莫敢欺時賊甚熾乃募壯士立款民協官軍
撫捕之賊漸却當道聞其才檄兼管慶遠衛事威振盜

息乃修建闕堡串樓建三元祠預備倉以征峽功陞正三品仍兼慶遠軍事後以憂去民甚思之

龔璘字文昌番禺人永樂癸丑進士天順間以御史歷柳州知府悉心整理九載奏績巡撫葉盛薦其熟知民情持身端諒陞授職俸仍管府事初田州土官岑鏞曾請璘作祠堂記操筆立成牖其天性之孝却其贄金鏞大畏服後致仕歸道賊境攜數十簏以行賊追劫之啓鑰則皆書籍也

黃嵩龍溪人舉人天順間平樂知府政尚平易勤拊循
徭夸語言不能自通俾譯者傳諭必達其情乃已夸獠
感服九年秩滿當道保留復任三年年七十致仕

吳讓字克讓南海人景泰中進士授廣西臨桂知縣以
清慎名天順己卯陞慶遠府知府慶遠在極邊所轄三
州皆土官各餽白金三百兩為贄悉却不受南丹知州
莫必善倍前數以懇之讓口占四句遺之曰貪泉酌爽
吾何敢暮夜懷金豈不知寄語南丹賢太守原封回贈

莫相疑居一年卒民泣慕之

葉禎高要人以鄉舉天順初同知慶遠府事忠勇廉幹
為民捍賊父子皆死於難贈廣西叅議立祠祀之

羅漢豐城人舉人天順間平樂府通判以簠簋自飭齋
舍蕭然四壁圖書衣被自隨以廉介稱

尹浦字文淵山陰人天順間貢入太學成化間授南寧
通判時郡中久苦徭患方議發兵人情洶洶公至單騎
入徭峒呼酋長與語諸酋相與就公問所由來公曰斯

行為爾曹乞生無他疑也因為具陳禍福諸酋感動顧謂其黨曰何如皆曰願從使君言遂相率羅拜定約而出尋督諸軍討水頭等峒皆捷大臣文章薦公庚子擢同知平樂平樂地皆巘山互壑徭憑險出沒非時剽掠居民如處甯中動慮機觸不敢輕往來農末俱廢公至居月餘間行巖谷盡得其形勢縱火悉焚林薄徭失藉潰散公因盡築城堡要害據守徭來無所匿從高巔遠覘歎息踟躕而去自是平樂遂為安土

莊瑜蘇州人天順間慶遠府學教授廉介自持嚴於立教凡節儀束修皆峻却之諸生雖燕見不衣冠不見也當道推重後以憂去士子仰其教澤久而不忘

鄭勝南城人監生天順元年任義寧知縣正值蠻賊燒毀縣治之後百廢叢集勝至創城郭新學宮次及橋梁道路壇場靡不修葺用夏變夸始有衣冠文物之盛

向珍大冶人天順間知興業縣賦性剛毅才識優長勸善懲惡百廢具舉時南征大軍連月經過處應得宜民

不受擾成化二年陞本州知州興學校勸農桑浚濠塹築欄馬垣禁貪暴民賴以安

周綱字文敘吳人天順間以經明行修薦授融縣丞有棄舟者十八人被誣以盜歷歲不能辯柳守檄君一訊而白後其人合錢五十萬來謝却之而去九載民挽留之時河間王忠肅公鎮兩廣疏其政蹟於朝即擢融縣知縣屬歲屢歉苗寇作民流亡者不可勝數君保障有法境內獨無事民始不知陸耕作詩諭之每春夏間躬

行阡陌勸課勞來不倦於是食足寇至可守縣學初在城外倡謀遷之以避寇難更立條約以教諸生遂變士習後多舉於鄉者俗好淫祀溺邪說力禁之

薛遠字維遠無為州人宣德壬戌進士累官戶部侍郎成化元年兵討兩廣蠻獠命督餉星馳調兵食師至如歸仍諭其衆能破賊者即有輜貨人人奮勇師至大藤峽躬冒矢石腹背夾攻賊平陞左侍郎

韓雍字永熙吳縣人成化改元廣西西延六峒大藤峽

荔浦修仁陽朔立山諸蠻蜂起為寇久未能下雍由浙江叅政擢僉都御史統京營漢達官軍及江南諸省兵往征之以陽峒大藤峽為賊巢穴乃集重兵長驅直擣其腹心又分兵於桂林平樂南寧沿江截殺以翦其羽翼明年賊平遂易峽名斷藤云雍上言善後事宜廷議皆從之五年以憂去六年起為左都御史提督兩廣兼理巡撫既至謂梧為廣東西要會道里適均始開府節鎮致仕卒於家巡按御史邱天祐請命立祠祀之謚襄

毅

張鵬字騰霄保定涑水人景泰辛未進士擢監察御史
天順丁丑率同列劾武臣石亨亨憾之構陷戍廣西南
丹衛成化四年韓雍平廣寇奏兩廣各設撫臣分理命
鵬巡撫廣西鵬嘗謫居其地備諳民情土俗凡政令之
出甚合時宜邊境用寧

朱英字時傑桂陽人正統乙丑進士成化十二年總督
兩廣撫輯猺獠各安生業諸峒氓有倡亂者購首惡誅

之田州知府岑溥與其叔恩平知州欽內屬久有頭目黃明者烝溥祖母而離間其叔姪劫衆以叛乃遣間使密諭欽誅明以雪家門之恥欽感泣遂斬明父子傳首軍門十六年平鬱林州木頭等峒蠻賊他如天河荔浦潯融間皆巨盜巢穴莫不畏服乞供職貢事聞上賜勅褒諭

周源字本清武昌人成化間廣西左參政分守柳州柳之都指揮王英貪暴士卒不勝擾譁而出城幾欲為變

公聞之急馳至諭以禍福遣歸營且劾英罪卒乃聽命
章律字鳴鳳常熟人景泰甲戌進士成化間廣西左參
政適歲秋旱齋沐率官屬露禱甘雨隨澍歲以大熟荔
浦獗賊竊發遣將徂征公受命監督率泗城兵由象武
路扼陳村口當賊要衝號令明肅且戰且徠遂擒渠魁
而悉散其脅從者營中屏竹槁而復生衆咸以為不殺
之兆捷音上聞特賜勅獎勵進秩正二品

朱鏞字廷用臨安人景泰丁丑進士累官廣西布政司

右參政甫至以軍務行邊紀功蒼梧督平鬱林賊還師桂林有疾致仕歸

熊景字開甫江西人成化己丑進士己亥廣西按察司僉事都臺朱公檄君勾當潯桂諸徭君陰遣間衣商人服負鹽抵徭所若為潛竄貿易者徭不疑也來詢虛實間曰吾商人不知新按察官何人然見其方具器若古壺狀者十數實石其中室以巨木計曰徭出降無庸發此不然此嘗破大藤峽者也徭懼白酋酋即日降不旬

日降猺及獞獠數十姓蓋君以謀勝也朱公大喜醵銀牌曰獎勞功勤以付君及請歸父老泣留不得

孔鏞字昭文長洲人天順庚戌進士成化間知田州府峒獠倉猝犯城公莅任纔三日身入峒寨諭之寢處飲食其中二日而出賊送至城賞以粟帛賊遂終公任不復出後為廣西副使與桂林知府羅珣編纂郡志後復為廣西布政使

林琦南海人舉進士成化七年知梧州府興學校尚教

化施政先後有條民便愛之

吳中樂平人舉進士成化十年知梧州府時韓襄毅初開府軍需旁午處之裕如百廢俱興民不見擾

陳嘉言東莞人成化間知平樂府有治辦才郡當孔道地雜猺夸擘畫撫安悉中肯綮治行籍有聲稱

蔡蒙字時中吳人成化中累官南寧知府下車即察問民間利弊民甚安之宣化縣民競渡誤死被誣入故殺律連七人訟繫淹久不決蒙得其情釋之已而大雨彌

月居舍蕩沒民漂死以千數君齋戒帥僚屬禱於山川
等祠為文引罪以祝是水即退視被災者悉賑卹之
田州守岑浦自恃土官驕悖不法與其族弄兵相攻殺
君以直詞曉諭皆感服釋仇不復敢爭至於興文舉義
明獄足食諸事盡瘁不懈以勞致疾乞歸

楊冠字尚文欽州人舉人成化間平樂知府輕徭薄賦
勤恤民隱尤加意學校建明賢書院以資麗澤創東西
社學以給蒙養捐俸金造祭器以秩祀事既去士民立

祠祀之

方祐桐城人成化初進士任御史以剛直忤中貴出守桂林是時各省會設中官鎮守祐剛直如故莅任甫一年挂冠歸

羅珣字用誠滇南人成化丙戌進士甲辰擢桂林知府丁未湖廣楊峒蠻肆行全永間藩憲諸司委珣督兵莅全防禦五月賊五百餘人由全之兼塘過湘江徑趨永之嶺背經黃沙渡會珣遣靈川沈知縣者統六峒獍丁

適至猝與賊遇敗走之賊遂退屯張家浦珣先遣謀者唐全嘗為賊所擄數年始得脫身歸賊素識其人欲與之相見全因攜酒饌飲食之誘賊由山路奔歸故巢賊信之不疑全即馳往報珣珣分布諸軍據其要害而身先士卒邀之迎戰於空王寺繼而戰於巖前又戰於角山鋪連大敗之斬首二百餘級餘衆竄匿巖谷數日不得食死者不可勝計獲歸故巢者僅十數人自是歲至弘治末十六七年間峒蠻不敢復出劫掠者皆珣之力

也

孫暉成化中由博白令屢薦擢知潯州府文武才行重於當時政尚寬簡不事鞭扑遷學宮修城堞興士庠民百務振舉遺愛最多

周尚文瓊山人舉人成化間平樂府同知籍有時譽六年以憂歸復除平樂吏民舉手相慶九年致仕去闔郡詣當道乞留不可得

劉昇江西人成化七年丞梧州識度超絕擘畫中理為

當路所咨

曾弘初太和人成化間慶遠府學教授剛直不阿善於
施教凡課諸生必手自校讎以恩結士心以禮變士習
後罹疾告歸

汪鏞字廷振祁門人舉人成化七年知全州政修民和
振作士類稱賢守

歐陽寅成化間知鬱林州首重學校繼寬徭役甚得民
心督兵征撫康鄉及陸川縣俱奏績陞南寧知府

吳孟侏廣東定安人成化中以舉人選知賓州州有八寨蠻屢為寇亂孟侏單騎入寨撫諭皆羅拜願受約束許入城貿易禁帶刀劍弓箭由是蠻人信服州以無事薦陞從四品散官仍治州事後以憂去任八寨峒蠻及南丹賓州二衛所旗軍相率陳狀乞留孟侏復知本州胡高安福人由鄉薦成化間知象州單騎諭賊以禍福賊渠法慶懣服就撫州境賴安且恤民愛士建州治修學校士民懷之

胡琛鎮江人進士成化間以御史謫起鬱林知州才猷敏達心術光明凡所興革裁處合乎時宜遠近便之

何堯中銅梁人舉人成化八年橫州知州廉平簡易新學校修壇壝賑荒恤孤抑強扶善奏革運表巡司任七載陞桂林府同知

黃蘭成化間永安知州廉靜有才略民徭相安在任七年擢平樂同知仍管州事又六年其惠澤沾漑最久

劉規進士成化間以御史左遷鬱林判官在任親賢去

奸甚得民心

劉琯海陽人舉人成化八年任橫州學正持身端謹訓誨有方士皆督入號舍每日授書講解不急率五鼓升堂背書至夜鎖舍暗察其惰者而朴之二鼓盡乃就寢諸生有梗教者繫之明倫堂以示懲時州守何堯中修學日親至視工諸生曰盍出迎之琯曰修學有司職也講學吾職也各盡其職而已何迎焉坐講不輟一時文教大興諸生贄禮不苟受亦不苟辭積頗贏則遣人至

廣州市銅錫祭器歸於學在任八年歸學者咸稱之
葉暢舉人成化間任鬱林學正操履端方規度整肅為
一時師範之良陞國子監學錄

吳伯璋閩縣人成化庚寅任全州儒學訓導勤於教人
惟恐其不能成尚書蔣昇及其弟大學士冕皆出其門
性澹泊非分不以干人一時藩憲諸君子皆愛重之修
桂林府志又修全州志筆削謹嚴是是非非無所苟

劉勝江西人成化間知博白縣當軍興之後流離始復

緩役蠲租民以安業

莊概成化間知陸川縣簡易近民庶事畢舉塞陂溉田九年榮滿民思之

劉滄巴陵人成化間知蒼梧縣時兵荒流徙撫循安集俾得其所民今頌之

龍韜曲江人領鄉薦成化間知容縣值寇劇民多流徙韜閱險設畧嚴督捕禦民賴稍蘇邑自洪永來屢經兵燹田賦縮額強半民鬻妻孥填溝壑韜率里老疏請憲

廟下鎮臣韓襄毅勘議檄同知金廷璽推官鄭義履畝覈實以聞蠲米五千六百七十餘石蓋蠲五之三焉自是民始復業

楊綱字秉衷岳陽人由舉人成化癸巳知陽朔縣學前居民俱結茅栖止常被火災為學宮患徙之則拂其性責以覆瓦則力有不堪乃以已俸資借之各有寧宇

許潛詔安人成化中令平樂時峒獠出沒徵調煩苦潛躬詣諸峒諭以恩信稍稍斂戢民有訟田數年不決餽

金求直者潛憮然曰以某之門而猶有賄是行不信於民也閉閣累日其人惶懼伏罪在事三年無餘貲卒於邸太守捐俸治喪民為罷市

閉魯任桂林推官成化間巡撫朱英奏復立山縣推擇魯守之在任八年學校戶賦兵防水利率其開創至今猶循故畫焉祀名宦祠

夏瑋湖廣人成化中知恭城縣城舊在鳳凰山下土陘地卑民多疾疫瑋改卜黃牛岡之原為政寬厚不苛民

懷其惠

劉時雍廬陵人成化弘治間知富川縣以科第寥落躬督士子為文會政務節愛善拊循徭夸有詣縣者善諭遣之邑稱大治卒於官

夏忠字尚忠貴溪人由監生任永福知縣勵精政務百廢具興獎拔才賢精潔祭祀其詩文尤有聲譽

馮漢字朝宗瓊山人由監生成化十八年知義寧縣軫念殘民勅修縣志九年任滿致仕

謝宇化州人成化間知陸川縣招集流移復興縣治
陳明臨江人成化間知陸川縣為政寬簡大得民心
王坦成化間任北流主簿黜豪強惠孤獨民頌其德
紀通成化間陸川訓導署縣事兵亂民散治教得宜都
御史韓雍具奏保陞本縣署主簿

璩綸宜山人由舉人成化間典陽朔教事以師道自重
嘗秉燭明倫堂督諸生夜宿講通經史多至三鼓後累
歲科名不乏皆其作養之功云

譚洪番禺人成化十三年任興安教諭教誨不倦士類興起

屠浦字朝宗鄞縣人成化丙戌進士累官都察院右都御史弘治改元總督兩廣軍務兼理巡撫未一年斬獲猺獞數多柳州諸處戍軍舊皆番調風土殊習比代死亡過半乃為區處分守多所全活

秦紘字世纓單縣人弘治三年以右都總制兩廣破岑欽鷓鴣嶺走匿泗城遂克田州時總兵安遠侯柳景貪

不法絃劾之逮景下獄追贓鉅萬褫其爵景於內降減贓且撫他事誣公亦被逮吏部尚書王恕救公內批改南戶部尚書

閔珪字朝瑛烏程人天順甲申進士弘治五年以右都御史總督兩廣番陽瀧水柳慶平樂瑤獞相繼為亂討平之其討古田也都督馬俊及參政馬鉉敗死時以致敗自俊乃引咎自劾時議又欲濟師珪謂罪止首惡乃設重購緝之已而賊果自縛以歸安南使臣奏入貢道

憑祥龍州輒為所梗詔下處分珪曰是亦各有罪焉乃
行安南毋得挾私貨行憑祥無得阻貢物爭遂息八年
進南京刑部尚書

鄧廷瓚字宗器巴陵人景泰甲戌進士弘治九年總督
兩廣於羣蠻結以恩信兵不輕出出則成功若鬱林州
雲壚大桂諸種作亂以次平之

劉大夏字時雍華容人天順甲申進士弘治十三年總
督兩廣勅使臨門即攜二僮以行旌賢才斥貪穢裁冗

費更役法上下不便者一切正之先是上思黃智永生三子長英次敬又次錄英先智永故英子鈞當襲敬之子塗欲立其子理乃賂思明府申以理當襲藩司駁其妄將罪之理遂糾遷隆峒王愷兵攻州奪印官司擒理下太平府獄暮夜越出仍授愷兵破執鈞子濬溪支解之大夏以兵擒理伏誅又左州土官絕改流官治之土人黃金挈家僑居上思州後歸賂吏目趙綸疏金係官族當復土職又賄吏目汪文疏之俱不報會督府徵兵

於州金願充頭目率兵以從既而違期府遣州吏目黃文通促之不發乃火其營金忿遂與其黨率所領兵還攻州治焚文通家殺其子武盡掠州民貲畜此聚自保大夏遣兵捕金下獄誅之戢兵息民十三村藪盜為之衰止鎮帥閫臣私役戍卒悉取還伍時有請添設兵備諸官者大夏言官無定制上有十羊九牧之擾民無定役下有阜隸馬夫之費況司府官員名重於利猶知自檢州縣之佐利重於名徒增民害因奏革撫徭叅政捕

盜通判等官數十員民多稱便官至兵部尚書卒諡忠宣

蕭翀字凌漢內江人成化辛丑進士弘治十四年以右都御史總督兩廣先是古田賊韋朝威伏殺副總兵馬俊叅議馬鉉其後益熾古田及永福邊山靈川七都百餘里皆其巢穴久為民患至是調兵大征悉從招撫又左州土人黃金謀復土官不克而死有韋廣明者復冒黃族求復知府鄧炳訊其詐繫廣明於獄杖殺之至十

五年炳往征古田以知州李欽承攝府事訓導游漢攝
州事廣明弟廣隆乘虛聚兵縛漢而脅取州印奔下雷
峒种檄柄遣土官趙元瑤許世忠往征之元瑤購得印
世忠購得廣隆下府獄杖殺之盡索其黨寘諸法

潘蕃字廷秀崇德人成化丙戌進士弘治十五年以右
都御史總督兩廣平思恩土官岑濬之亂又平思明黃
紹及黃文昌之亂召為南京刑部尚書

舒清字本直德興人成化進士弘治八年為廣西布政

使廉平仁恕事有不可必極力拯護憲宗遣中使取古
琴玩物清抗疏止之民得不擾凡一切饋遺斥出備軍
供致政歸惟圖書數卷時羣盜剽掠村落過清家握手
相戒曰此清官家不可犯蒼梧吳廷舉自負氣節於人
少所推遜會災異疏陳時政獨薦舒清謂其遺愛在民
近子產外和內剛近胡宿清不求人知近胡質急流勇
退近錢若水其為名流所推重如此

龐泮字元化天台人成化甲辰進士弘治中累官廣西

左布政使以思恩土官有叛謀公檄降之近省蠻獠有乘虛竊發者軍民日虞其偪莫知所為公拔民丁資以倉粟躬督迫之賊皆遁去

馬鉉字孔任永新人成化八年進士累官工部郎中擢廣西右參議弘治五年邕容間羣蠻跳梁朝廷命守臣分道出兵勦之副帥馬俊當自古田入俊負勇自雄衆推君偕行行且百里初與寇遇殺獲頗利俊易之明日入益深數阻塹君慮寇有備戒勿進俊謂前軍度者殆

盡此何足慮復行路屈曲而隘僅容一騎士卒隔絕不相顧俄伏發叢薄間君遂併遇害報至贈右參政

林泮字用養閩縣人成化壬辰進士弘治戊午廣西參政奉勅總督糧儲兼理屯田時逋欠三十三萬泮知湖米方賤下令減直收銀差官往糴湖米民甚便之輸不後時既半年逋欠畢集全州千戶謝表剝下奉上軍民切齒泮白上司窮治之一方稱快

張吉字克修餘干人成化辛丑進士弘治間副使兵備

府江申教令嚴武備察奸吏擇將領次第兼舉推誠御
下其教士以射則懸金為的中者與之又以意創鴛鴦
銃偏架弩做種世衡教射青澗及韓世忠製克敵弓之
為者公以所轄沿江山川盤結林木蒙翳或扼要害或
縱斧斤以奪其藏伏之所又以賊恃藥弩中者必死厚
募解藥多置挨牌重賞間謀邀截出入又以府江東西
二賊相為犄角而東賊慄悍尤甚遂併力於東數月之
間斬獲甚衆由是西賊聞之亦皆自戢府江以寧癸亥

考績入京有更張公法者賊復乘時而起鎮巡以聞詔促還任會與地方用事大臣不合引疾求去時吏部尚書王恕素知公癸丑轉梧州知府梧州乃兩廣鎮巡開府建節之地輪蹄交錯殆無虛日供帳館穀不勝其繁民多四徙不樂土著公至凡百節損先是榷鹽之利盡歸於守至是出之悉以佐費復推其餘修壇壝廣學舍凡不均之徭皆釐正之於是民之徙者舉相率而歸暇日躬課諸生為講說聖賢修己治人之道使人知所嗜

嚮尤嚴於丁祭廟樂崩壞延樂師呂應禎聚諸生習之
至於將事之際卜牲之外微而蒞韭皆一一徧視觀者
竦然生敬

周孟中字時可廬陵人弘治元年廣西副使董學政寬
嚴得體善著述廣西舊志孟中所裁定官至左副都御
史

彭甫字原嶽莆田人弘治八年廣西提學僉事學有本
原尚志節抗直自遂以論篤君子為時所稱

陳陽字健夫新塗人弘治癸丑進士累官廣西按察司僉事風裁猷慮卓越一時會右江缺兵備巡撫林公廷選上疏極言公學識節介忠鯁練達右江夸寇跳梁民瘁兵疲非公無可為者乃陞右江兵備副使蠻獠號稱八寨者獷悍為一道梗自國初來莫或柔之公御以誠信諭以威德即感悅請立堡為右江氓

粵西文載卷六十四